



Broj: 06-1-07-3-105/21

Sarajevo, 26.02.2021. godine

Na osnovu člana 2.9 stav (1) tačka 9, a u vezi sa članom 13.10 i članom 13.5 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20) i Poglavlja VI. Uputstva o postupku provedbe posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine („Službeni glasnik BiH“, br. 38/14, 90/16, 8/17 i 91/18), Centralna izborna komisija Bosne i Hercegovine je na 29. sjednici, održanoj 26.02.2021. godine, d o n i j e l a

## O D L U K U

### o utvrđivanju rezultata posrednih izbora i dodjeli mandata iz Općinskog vijeća Centar Sarajevo za Gradsko vijeće Grada Sarajeva

- (1) Centralna izborna komisija Bosne i Hercegovine utvrđuje rezultate posrednih izbora za Gradsko vijeće Grada Sarajeva iz Općinskog vijeća Centar Sarajevo, kako slijedi:
1. kandidatska lista političke stranke POLITIČKA ORGANIZACIJA NAROD I PRAVDA, dobila je **sedam (7) glasova**,
  2. kandidatska lista grupe vijećnika KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJA KATICA, dobila je **tri (3) glasa**,
  3. kandidatska lista grupe vijećnika ĆOSOVIĆ, KHATTAB, MUHAREMOVIĆ, ŠLJIVO, ŠENDEROVIĆ, dobila je **pet (5) glasova**,
  4. kandidatska lista političke stranke POG NAŠA STRANKA dobila je **šest (6) glasova**,
  5. kandidatska lista političke stranke SAVEZ ZA BOLJU BUDUĆNOST, dobila je **nula (0) glasova**,
  6. kandidatska lista grupe vijećnika ZULFIKARPAŠIĆ, STEVANOVIĆ, MAJSTOROVIĆ dobila je **osam (8) glasova**.
- (2) Centralna izborna komisija Bosne i Hercegovine dodjeljuje mandate u Gradsko vijeće Grada Sarajeva iz Općinskog vijeća Centar Sarajevo sljedećim vijećnicima:
1. **Jasmin Ademović (Bošnjak)**,
  2. **Biljana Lazarević (Srbin)**,
  3. **Lajla Ćosović (Bošnjak)**,
  4. **Nihad Uk (Ostali)**,
  5. **Amra Zulfikarpašić (Bošnjak)**,
  6. **Željko Majstorović (Hrvat)**,
  7. **Dragan Stevanović (Srbin)**.

## O b r a z l o ž e n j e

Općinsko Vijeće Centar Sarajevo dostavilo je, dana 10.02.2021. godine, Centralnoj izbornoj komisiji BiH akt, broj: 01-45-71/21 od 10.02.2021. godine, te u prilogu istog cjelokupan materijal o provedenim posrednim izborima za Gradsko vijeće Grada Sarajeva.

U skladu sa članom 22. Statuta Grada Sarajeva („Službene novine Kantona Sarajevo“ br. 12/98, 14/98, 25/05, 23/08 i 32/08) svako općinsko vijeće vrši izbor po sedam (7) delegata u Gradsko vijeće.

U postupku izbora vijećnika za Gradsko vijeće Grada Sarajeva, od 31 vijećnika u Općinskom vijeću Centar Sarajevo, glasali su svi vijećnici za prethodno ovjerenih šest (6) kandidatskih listi.

Na osnovu uvida u dostavljeni materijal utvrđeni su sljedeći rezultati:

1. kandidatska lista političke stranke POLITIČKA ORGANIZACIJA NAROD I PRAVDA, dobila je **sedam (7) glasova**,
2. kandidatska lista grupe vijećnika KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJA KATICA, dobila je **tri (3) glasa**,
3. kandidatska lista grupe vijećnika ĆOSOVIĆ, KHATTAB, MUHAREMOVIĆ, ŠLJIVO, ŠENDEROVIĆ, dobila je **pet (5) glasova**,
4. kandidatska lista političke stranke POG NAŠA STRANKA dobila je **šest (6) glasova**,
5. kandidatska lista političke stranke SAVEZ ZA BOLJU BUDUĆNOST, dobila je **nula (0) glasova**,
6. kandidatska lista grupe vijećnika ZULFIKARPAŠIĆ, STEVANOVIĆ, MAJSTOROVIĆ dobila je **osam (8) glasova**.

Odredbom člana 13.10 stav (2) Izbornog zakona Bosne i Hercegovine propisano je „da mandati za gradsko vijeće, odnosno skupštinu grada dodjeljuju se kandidatskim listama po sistemu proporcionalne zastupljenosti političkih stranaka, koalicija, listi nezavisnih kandidata ili grupa članova, kao što je utvrđeno u članu 13.5 ovog Zakona. Raspodjela mandata među kandidatima sa iste liste vrši se prema redoslijedu na listi kandidata za ove izbore.“

Imajući u vidu naprijed navedenu zakonsku odredbu, raspodjelom mandata iz Općinskog vijeća Centar Sarajevo u Gradsko vijeće Grada Sarajeva, prema utvrđenim rezultatima iz stava (1) dispozitiva ove odluke, bila bi delegirana tri vijećnika iz reda bošnjačkog naroda, jedan vijećnik iz reda srpskog naroda, tri vijećnika iz kategorije ostalih, te nijedan vijećnika iz reda hrvatskog naroda.

U skladu sa članom 23. stav (5) Statuta Grad Sarajeva, svako općinsko vijeće koje čini Grad Sarajevo delegira najmanje jednog kandidata iz reda konstitutivnog naroda. Općinsko vijeće Centar Sarajevo za Gradsko vijeće Grada Sarajeva, od sedam izabranih gradskih vijećnika, nije delegiralo najmanje jednog kandidata iz reda konstitutivnih naroda, **odnosno nije delegiran vijećnik iz reda hrvatskog naroda.**

Odredbama člana 23. stav (11) Statuta Grada Sarajevo propisano je „Ukoliko se ovako provedenim izborima u općinskom vijeću za Gradsko vijeće među sedam izabranih gradskih vijećnika ne dobije minimalno potrebna zastupljenost vijećnika iz pojedinog konstitutivnog naroda, kako je to navedeno u stavu 5. ovog člana, umjesto izabranog vijećnika za Gradsko vijeća s najmanjim količnikom iz reda naroda za koji je i bez tog vijećnika zadovoljena minimalna zastupljenost, delegira se općinski vijećnik pripadnik naroda koji nije zastupljen u potrebnom broju među delegatima iz tog općinskog vijeća, a koji je na kandidatskoj listi kojoj pripada sljedeći najveći količnik. Ukoliko na toj kandidatskoj listi nema kvalificiranog kandidata, utvrđuje se sljedeći najveći količnik i tako sve dok se ne dođe do kvalificiranog kandidata.

Imajući u vidu da raspodjelom mandata na način propisan članom 13.10 stav (2) Izbornog zakona BiH nisu zadovoljene odredbe člana 22. stav (2) i (3) i člana 23. stav (5) Statuta Grada Sarajeva preraspodijeljena su dva mandata i to jedan kandidatu iz reda hrvatskog i jedan kandidatu iz reda srpskog naroda, sa listi koje imaju najmanji količnik, a kojim postupkom se neće narušiti minimalna nacionalna zastupljenost.

Uvidom u ovjerene kandidatske liste iz Općinskog vijeća Centar Sarajevo utvrđeno je da se na kandidatskoj listi Kandidatska lista GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ na poziciji 4. nalazi neizabrani vijećnik **Stevanović Dragan**, kandidat iz reda srpskog naroda i da se na poziciji 6. nalazi neizabrani vijećnik **Majstorović Željko**, kandidat iz reda hrvatskog naroda.

Nakon provedenih posrednih izbora iz Općinskog vijeća Centar Sarajevo utvrđeno je da najmanji količnik imaju:

- a) Kandidatska lista POLITIČKA ORGANIZACIJA NAROD I PRAVDA (2,33),
- b) Kandidatska lista GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ (2,67) i
- c) Kandidatska lista KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJA KATICA (3,00).

Na osnovu odredbe člana 23. stav (11) Statuta Grada Sarajevo, umjesto izabrane vijećnice Bosno Senade na poziciji pod rednim brojem 2. sa kandidatske liste GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ delegiran je neizabrani vijećnik sa iste liste na poziciji 6. **Majstorović Željko** iz reda hrvatskog naroda.

Nadalje, kandidatska lista POLITIČKA ORGANIZACIJA NAROD I PRAVDA ima najmanji količnik (2,33). Međutim oduzimanjem mandata vijećnici Lazarević Biljani iz reda srpskog naroda narušila bi se minimalna zastupljenost konstitutivnih naroda.

Na osnovu odredbe člana 23. stav (11) Statuta Grada Sarajevo, umjesto izabranog vijećnika za Gradsko vijeće Grada Sarajeva sa sljedećim najmanjim količnikom sa kandidatske liste KLUB SAMOSTALNIH VIJEĆNIKA ĐENAN MUMINOVIĆ - prof. Dr. VELIJA KATICA, **Katica Velija**, delegira se općinski vijećnik sa kandidatske liste GRUPA VIJEĆNIKA ZULFIKARPAŠIĆ, STEVANOVIĆ, MAJSTOROVIĆ **Stevanović Dragan**, vijećnik iz reda srpskog naroda.

U skladu sa rezultatima koje je utvrdila Centralna izborna komisija Bosne i Hercegovine i naprijed navedenim odredbama, dodijeljeni su mandati vijećnicima na način kako je to navedeno u stavu (2) dispozitiva ove odluke.

Ova odluka stupa na snagu danom donošenja i objavit će se dana 26.02.2021. godine u 15:00 sati na web stranici Centralne izborne komisije Bosne i Hercegovine, [www.izbori.ba](http://www.izbori.ba), i smatrat će se da je danom objavljivanja ista dostavljena svim učesnicima u izbornom procesu.

**PRAVNA POUKA:** Protiv ove odluke, u skladu sa članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objavljivanja ove odluke.

Žalba se podnosi putem Centralne izborne komisije Bosne i Hercegovine neposredno u sjedištu Centralne izborne komisije Bosne i Hercegovine, ulica Danijela Ozme broj 7, Sarajevo, putem faks aparata na broj: 033/251-329 ili elektronskom poštom na e-mail adresu: [kontakt@izbori.ba](mailto:kontakt@izbori.ba).

Dani 27.02.2021. godine (subota) i 28.02.2021. godine (nedjelja) su radni dani u Centralnoj izbornoj komisiji Bosne i Hercegovine i isti se računaju u rokove za podnošenje žalbi.

Predsjednik  
Zeljko Bakalar

